

Mes Piz: Péz Mundaun

DAD AUGUSTIN BEELI/FMR

■ Cresta Munteina, Platta Pussenta e Pezza Mundaun, valan dapli che Brescia e Milaun»: Quest verset è in citat or dal cudesch «Die verzauberten Täler – Kulte und Bräuche im alten Rätien» e mussa l'impurtanza da tscherts lieus. L'investg Cristianus Caminada menziuna quai en sia ovra da standard cumparida 1961. Il verset tira il connex da Sagogn cun «ses» Péz Mundaun. Or da nagin auter lieu sa preschenta el meglier. El para grond, franc e senza concorrenza. Dal vitg situà a l'ur da la Foppa pon ins distinguer ch'igl è in vair piz. Or da la perspectiva da tut las autras direzziuns èsi nagut auter ch'in crestet da 2064 m s.m. Atgnamain èsi il piz da la Surselva, tschentà sco in cugn amez la vallada. Da Sagogn anor mussa el sia plaina bellezza. Mundaun signifitga dal rest ch'igl è in territori «mundà», vul dir schubregià e liber da gaud. Avant 150 onns han ins replantà sin sia spatla sanestra il gaud da sogn Carli. Ch'il Péz Mundaun è insatge spezial han gia ils piuniers dal turissem s'encurschì, da quel temp deriva er la noziun «Bündner Rigi».



ILLUSTRAZIUN FMR

Cifras e fatgs:

Num:	Péz Mundaun
Autezza:	2064 m s.m.
Ascensiu:	la pli bella ruta maina davent da l'ustaria Bündner Rigi, en circa duas uras.

En ina pitschna seria cun il titel «Mes piz» preschenta la redacziun da la FMR quests dis mintgadi in piz – tranter Müstair e Tschamut. Quella «pizzaria» vali la paina da scuvrir questa stad da «distanza», cun chaminar enfin sisum u alura era mo cun contemplar ils pizs da tsentsi, sco lieu da desideri.

